

A Taa ufm Dorf

A *feine* Rejn is aus die Wolke langsam uf die Erd gfall, es war ganz schwül hinerem Newel hat mer die Akaazibääm ganz gut in die Gasse gsiehn kenne. Die Vegl han sich alli unner die Dächer, un so wu se halt Unnerschlupp gfun han, vor dem Rejn verstecklt. Bloß phaar Kracke sin in dem Wetter ganz niedrig iwer die Erd gfloo. Vun de Werschitzer Berche her hat a warme Wind geblost un hat die Leit den Rejn ins Gsicht getrieb. Die Wassergräwer in de Gasse ware voll zum iwerlaafe,

un der Rejn hat gar net ufheere wille. De Schmiedt vun der aneri Gasse seit hat vor seiner Werkstatt gstan un sei Ärm iwer der Bruscht zammghall un hat deni Rejntroppe nohgschaut. Vore im Hof han ferdichi Räder, Plich un noch aneri Maschine gelej, die ware ferdich for abhole. In dere Tir hat a Lehrbu glimmelt, der hat a großes Lederferter anghat. Aach der hat schlofrich in de Taa nin gschaut. Do fährt de Kleenhanse Hans mit seim Waa vor die Schmiedwerkstatt, sei vorderi Achs an dem Karre war total abgebroch gwen. De Lehrbuu hat die Ross selwer ausgespannt, un hat den Waa hoch ghob un die Räder rausghol die Achs ausgebaut un dem Meister getraa, der schun gewart hat. Der Meister hat die Ax ins Feuer ningeleet, hat Kohle druf geworf, un der Lehrbu hat mit dem Blosbalch des Feuer angebrennt, dass es nor soo geraacht hat. Mit ener grossi Zang hat der Meister die Achs aus;m Feuer ghol, hat den Schlack vun dere gliedichi Achs abstraaft, un dann is es losgang. Der Meister un der Lehrbu han drufschlaa, dass die Funke gfloo sin. So lang han se drowerum gegloppt, bis die Achs wie nei war.

Phaar Heiser weiter sin Weiwer hin un her geloff un han ihrem Bu sei Name in den Rejn ningeruft. Der hat sich hinner em Klettestock am Gartezaun versteckelt ghat. Dem falle alli Dummheite in, wann de Taa lang is, han die Weiwer gsaat, wie se ne gfun han. Er wollt mit aller Gwalt ihre alti Gluck im Wasswegraawe schwimme lerne.....

Am große Wertshaus han sich a Haufe Männer an die Fenschtre die Nas braat gedruckt vor nin schau. Drin im Wertshaus hat de Großmatze Jergl un de Stuprich Toni mit;m Sulzmatze Niklos geraaft. For was se geraaft han, des han net mol sie selwer gewisst, warscheinlich hat niemand den Wein zahle wille, den was sie getrunken han.

Uf der aneri Gasse seit is es Marjan, em Storzebauer sei Jingschtes, vun der langi Gass, mit a bisl ufgebunneni Reck, in ener jedi Hand a Gießkantl, an den Pumpbrunne um frisches Wasser gang. Die Rejntroppe han sich an dem Mädli seim Gwand feschtghong Desweje hat mer sei weibliche Sache, die noch im Auswache ware, so gut gsiehn, un alli Buwe ware dere Meinung, das es Marjan ens vun de schenschte Mädle im Dorf is.

De Rejn hat langsam ufgehrt. Die Gärten vor de Heiser ware ganz farwisch vun die vieli Rose, was dort angesetzt ware. Alli Blume han angefangt ihre Kepp in die Luft zu strecke, als wollte se ganz owe nuf iwer die Wolke gsiehn, un die Beem uf dr Gass un in de Gärten han die letschti Wassertroppe falle glosst.

Mr gspielt a feines Singe un Summe in dr Luft, mr weeb net, was es is un vun wu es kummt, awer es hat de Leit a ganz anderes Gfuehl zugephischpert.

De Wind is ganz langsam vun em Baam zum anere ghupst un hat die Blätter zärtlich gschmaichlt.

Die Vegl sinn in dr Luft gfloo un han vor Freid ihre Lieder, vun owe deni Leit, runer gepiff.

Die Kiner selwer, die noch in dr Schulbank gsitzt han uns Enmol ens vum Lehre lerne han misse, deni ihre Gedanke ware ganz wu anerscht, weit, ganz weit weg, uf dr Hutweid oder wer weeb wu.

Un so sinn die Stunde an selem Taa langsam vorgschlich , un drauß in dr freiji Natur hat die Sunne , die jetz wieder do war ,ihre Strahlekinner iwer die Wiese un Felder laafe glosst.

De Owet is kumm , die Dorfleit sinn mied vun dem Taa gwen , de Rejn un die Luft hat die Leit un Kinner schlofrich gmacht . Ach es Halterviech is matt vun so em Taa vun dere Waad hemkumm, un es hat net lang gedauert , do han schun bal alli vor Miedichkeit tief gschlof.

Nor die ganz alti Leit han net schlofe kenne, manchi han mit uffeni Aue getraamt, anneri wieder han Schmerze in de Glieder ghat , un manchi ware dere Meinung, dass se schun in seller Nacht sterwe misste .

Un mitte in dr Nacht hat mer vum Kercheturm her die zwelfti Stund vun dere Kercheuhr schlaan gheert, a sichere Zaiche das der Taa wieder rum war .

Hans Niedermayer , Dolatz